

AHANTZI

FELIPE JUARISTI

—Gerorik ez dago,
ahantzia da,
segika datorkiguna.

—Ahantziaren ibaiak
iragan gorputzak,
harriz-harri saltoka
bizitzeko oztopoak,
suspirioak arrastaka,
nostalgia isuriak.
Izpiritua aireratzen,
hodei izan nahian,
euritan jausten,
hura baita airekoa.
Lehen izan ginena
berriro izango gara.

Julio Zesar-ek Marco Brutori, eskuan puinalea ikusi ondoren:

—Marco, semea, eskuan daukazunaren orde, zer zenuke
nahiago?

Marco Bruto-k Julio Zesar-i:

—Munduan den ahaztura guztia.

—Elkar ahazteko korritu dugu
nik mundu erdi bat, zuk bestea.
Beti amaitzen dugu, ordea, elkar aurkitzen.

AINGERU

- Zer gertatzen da pospolo bat piztu eta zigarroa erretzen den bitartean?
Aingeru bat igarotzen da hegoak erreta.

AMAPOLA

- Hegan dagi abioi batek izar elektriko urdinekin amesten, zerua ordea ilun dago, lau egun darama atertu gabe. Egunaren minean amapola beltza.

AMODIO

- Eskuaz igurtzi ninduzun.
Izan zinena naiz, harez gero.
- Ibai-urek murmurio jolastaria.
Amodio joanak ajolarik ez.
- Betazalak ixten ditut, irekitzen ditut tximeleta-hegoak bailiran, zaldi baten modura noa aspala eguzkiloreen zelaietan barrena; Ezpainak ixten ditut, irekitzen ditut, bi tximistargi bailiran, argi bila, enara bat naiz hegan doana mahasti-sailak ikusmiran.
Zu osorik sartzen zara nire ahoan, fruitu gozoa, lore usaintsuan sortua.
Zu osorik desegiten hortzetan.
Zure izena...

Sokrate- Bada gure bizitzan une bat non gure gorputz-zatiak pisuagoak egiten diren; espazioa orduan zabaltzen da, denbora laburtzen eta arnasa ere nekez hartzen.

Alzibiade- Nekea ote?

Sokrate- Amodiaren bezpera.

APIRIL

- Apirila, hautsirik jaioa.
Begiak mogitzen
metalezko ezpal goriak bailiran,
eta zure bekokian
bere arraiak ditu utzi
tigre otzandu batek.

ARIMA

- Den-dena eman nahi izan nizun
baina eman nizun ezer ez;
gorputz-haragia eman nahi izan nizun
baina eman nizun anima:
zure belak betetzen dituen arnasa.
Ihesi zoaz mantso-mantso nigandik.
Eta geratzen naiz bakarrik.
Ni gabe.

ARITMETIKA

Alzibiade:- Maisu, zergatik da hain zaila herri honetan politikaz hitzegitea?

Sokrate:- Aritmetika jakin behar delako.

Alzibiade:- Nola da hori?

Sokrate:- Hildakoak zenbatzen amaitzen dugulako beti.

AUSENTZIA

- Joan zarenetik
ezerk ez nau izutzen.
Herioa eta biok buruz-buru
dugu hitzegiten
gure etxeko atarian
lagun minak baikinen;
eta haren kaparen gainean.
dadotan jokutzen.
- Kolarearen gabezia
da jaiotzen goizik ederrena.
Zeinu perfektu ororen ezean
garaitzen poemarik handiena.
Zure gabezia naiz jaioa,
minaren maskorretik
berri eta biluzgorri.

BASAMORTU

- Basamortua aurrera zihoan
eta ez ginen ohartzen.
Esperantza genuen.
Horregatik ginen hainitsu.

BAKARDADE

- Telefonoz deitu nizun
zure ahotsa entzuteko.
Komunikatzen ari zen.
Ezpata moduko zarata bat.
Ebaki zizkidan ezpainak.
Eta ez dut hitzik ahoratzen.

BI

- Batzutan, bi hizkuntzak
geratzen zaizkit eztarrian,
burnizko bi ezpata bailiran.